

Dostavili:

UDRUŽENJE GRAĐANA ITALJANSKOG PORIJEKLA - SARAJEVO
ASSOCIAZIONE DEI CITTADINI D'ORIGINE ITALIANA - SARAJEVO



Izveštaj o radu Vijeća nacionalnih manjina Federacije Bosne i Hercegovine za 2012. godinu

Na osnovu odredaba Zakona o zaštiti prava pripadnika nacionalnih manjina u Federaciji BiH, (Službene novine FBiH br: 58/08), te Odluke o osnivanju i imenovanju članova VNM FBiH, koju su usvojili oba doma Parlamenta FBiH (Službene novine FBiH br: 79/09) imenovani su članovi VNMFBiH, uz uredno obavljenu proceduru predlaganja i izbora, kako je to Ministarstvo pravde FBiH propisalo a Dom naroda i Zastupnički dom PFBiH potvrdili. Konstituirajuća sjednica održana je 15. 2. 2010. godine.

U pomenutom periodu VNM Federacije BiH, održalo je šest sjednica: 16. sjednica - 17. 1. 2012. godine; 17. sjednica - 7. 3. 2012. godine; 18. sjednica - 19. 4. 2012. godine; 19. sjednica - 5. 6. 2012. godine; 20. sjednica – 27. 9. 2012. godine i 21. sjednica 5. 11. 2012. godine.

Na žalost, i poslije skoro tri godine od konstituisanja VNMFBiH, još uvijek nisu riješeni osnovni uslovi za rad, što je ozbiljna prepreka. Tako se i tokom ove godine VNMFBiH bavilo elementarnim problemima – davanjem saglasnosti na Poslovnik o radu i Statut VNMFBiH, obezbjeđivanjem sredstava za rad VNMFBiH, podmirenjima troškova putovanja i naknadama članovima VNMFBiH. Aktualiziranje starih problema je dalo rezultate te su određene dvije osobe koje će voditi zapisnike i stručno pratiti rad VNMFBiH, a jedna u svojstvu administrativno - tehničkog sekretara, dogovoreno je da će se memorandum koristiti kao i do sada, rješavanje pitanja upotrebe pečata je u toku, završeno je pitanje protokolarnog broja, kreirana je službena e-mail adresa, izrađene su legitimacije, dok su izrada web adrese i predstavljanje VNMFBiH na zvaničnoj web stranici PFBiH u toku realizacije.

Uprkos tome, VNMFBiH je sastanke održavalo u skoro punom sastavu i nastojalo da u okvirima datih mogućnosti radi i doprinese poboljšanju položaja nacionalnih manjina u Federaciji BiH, participira u radu brojnih radionica, seminara i savjetovanja u organizaciji vladinog i nevladinog sektora, te domaćih i međunarodnih organizacija.

Tokom godine, uprkos teškoćama i problemima u funkcionisanju PFBiH, ostvarena je saradnja sa administrativnim komisijama oba doma PFBiH, što je rezultiralo donošenjem odluke o naknadama i putnim troškovima članovima VNMFBiH. Na žalost, ta odluka je samo djelimično provedena jer je VNMFBiH dobilo naknade samo za prva četiri mjeseca 2012. godine, a decembar prošle i ostali mjeseci ove godine nisu isplaćeni do momenta pisanja ovog izvještaja, kao ni naknada za putovanje članovima koji dolaze izvan Sarajeva, a što je još važnije nisu odobrena sredstva za rad VNMFBiH.

Naime, iako se u više navrata VNMFBiH obraćalo i Premijeru FBiH i ministru finansija FBiH, odgovor je dobijen tek poslije nekoliko mjeseci i to premijerov Ured traži od Federalnog ministarstva finansija izvještaj o dešavanjima vezano za VNMFBiH (koje se već drugi ili treći put obraća Premijeru FBiH). Pomenuto ministarstvo je ranije VNMFBiH uputilo prema PFBiH i na administrativne komisije oba

doma PFBiH. Da ne bi došlo do propusta, napomenuto je da su svi dosadašnji materijali (Plan rada za 2012. godinu, Finansijski plan za 2012. godinu sa dugom za 2010. i 2011. godinu i pismo koje je upućeno Premijeru FBiH), upućeni Federalnom ministarstvu finansija. Na žalost sva ova dešavanja, iako je VNMFBiH na vrijeme izradilo i svim relevantnim odlučiocima dostavilo pomenute materijale, vezana su za početak ove godine i VNMFBiH nije ušlo u Budžet za 2012. godinu, a za šta nije bilo razloga.

Nastojeći pokrenuti sve mehanizme koji mogu doprinijeti rješavanju aktuelnih problema VNMFBiH, razgovaralo se i sa predstavnicima Institucije ombudsmana u BiH i upoznao ih se sa problemima kroz koje prolazi VNMFBiH. Obaviješteni smo da su Ombudsmeni za ljudska prava BiH obavili razgovor sa predstavnicima oba doma PFBiH, odnosno Izmirom Hadžićem, sekretarom Doma naroda i Dobrilom Pletikosom, sekretarom Administrativne komisije Predstavničkog doma PFBiH, i predstavnicima komisija za ljudska prava i slobode oba doma PFBiH, a na kojem je konstatovano da je izostala koordinacija u radu tjela i organa u PFBiH koja treba da riješe naše probleme. Ombudsmeni će pratiti provođenje dogovorenog. Sa našim problemima upoznata je i organizacija "Vaša prava" i čeka se i njihovo mišljenje koje nikada nismo dobili.

Tako su komisije za zaštitu ljudskih prava i sloboda oba doma PFBiH podržale inicijative Austrijsko – njemačke zajednice i Etnografskog udruženja ruske, rusinske i ukrajinske nacionalne manjine, te predstavnika Rumuna koji, shodno Zakonu o zaštiti prava nacionalnih manjina žele da participiraju u radu VNMFBiH, kao i u slučaju Poslovnika o radu i Statuta konačnu odluku donose domovi PFBiH.

Pitanje, odnosno imenovanje novih članova još nije stavljeno na dnevni red. Još se čeka i potvrda pomenutih dokumenata na Domu naroda PFBiH (sjednica zakazana početkom juna prekinuta i nikada nije nastavljena), iako su i klubovi poslanika podržali rješavanje ovih problema.

Predstavnici nacionalnih manjina koji su zatražili ulazak u članstvo VNMFBiH u međuvremenu dok se ovi problemi ne riješe, učestvuju u radu bez prava glasa.

Tokom ove, kao i ranijih godina, VNMFBiH učestvuje u radu sa Vijećem nacionalnih manjina BiH. Poseban dio toga su aktivnosti oko izmjene Ustava BiH vezane za presudu Sejdić – Finci, te saradnju sa Fondacijom «Kristijan Švarc Šiling», a vezano za projekat za nacionalne manjine - radionica u cilju jačanja naših kapaciteta.

Po ko zna koji put svi navedeni dopisi su ponovo poslani svim relevantnim predstavnicima, predsjedavajućim i sekretarima oba doma PFBiH, predsjednicima administrativnih komisija oba doma PFBiH i komisijama za ljudska prava oba doma PFBiH, te zajedno sa Izvještajem o radu za 2011. godinu, te Planom rada i Finansijskim planom za 2012. godinu, i Federalnom ministarstvu finansija kako bi se riješilo pitanje finansiranja VNMFBiH, kao i Vladi FBiH, tačnije Premijeru uz poziv na Odluku o osnivanju i Zakon. Iako sve traženo u ovoj godini nije riješeno na zadovoljavajući način na sve pomenute adrese upućeni su i Izvještaj o radu za 2012. godinu i Plan rada i Finansijski plan za 2013. godinu.

VNMFBiH je u svom radu koristilo podršku koju su pružale međunarodne organizacije i učestvovalo u izradi Nacionalne strategije za rješavanje pitanja nacionalnih manjina BiH, u organizaciji OSCE-a, u sedam oblasti (Ekonomska, socijalna i kulturna prava, Očuvanje i razvoj kulturne baštine nacionalnih manjina, Obrazovanje nacionalnih manjina, Pristup nacionalnim manjinama medijima i informacijama, Političko učešće nacionalnih manjina, građanska i politička prava i Prekogranična saradnja) na Jahorini – 5. i 6. mart; u Sarajevu – 15. maj i Banjaluci – 4. do 6. juli, te u Budvi u organizaciji EU/OSCE-ODIHR susretima vezanim za ljudska prava i izradi Izvještaja o stanju ljudskih

prava u BiH - pokrivitelj Ministarstvo za ljudska prava i izbjeglice BiH, te radionic CCI vezano za saradnju nevladinog i civilnog sektora i vladinog sektora.

Članovi komuniciraju i sa ambasadama zemalja koje imaju svoje predstavnike u VNMFBiH. Razmatrali su se i problemi vezani za popis stanovništva 2013. godine, kao i loše strane Izbornog zakona, čije odredbe treba mijenjati, VNMFBiH je od svog nastanka insistiralo na dosljednoj primjeni Zakona o zaštiti prava pripadnika nacionalnih manjina, posebno člana 17.

Reagovalo se na žalbu Sakiba Mustafića iz Kiseljaka kod Tuzle, koji se obratio VNMFBiH zbog diskriminacije vezane za pripadnost nacionalnoj manjini. Njegova žalba je prosljeđena komisijama za ljudska prava i slobode oba doma PFBiH, te je o tome obaviješten žalilac, ustanova na koju se žali, ombudsmeni i Ministarstvo za ljudska prava i izbjeglice BiH. Reagovalo se i na problem Damira Mujića što sve ukazuje na težak položaj marginaliziranih grupa nacionalnih manjina, pa je s tom svrhom potrebno i uključivanje predstavnika VNMFBiH u rješavanje ovih problem još više nego do sada i aktivnosti nevladinih organizacija s vladinim, a koje se tiču položaja i prava nacionalnih manjina. Razmatrao se i problem obezbjeđivanja knjiga i školskog pribora djeci romske nacionalne manjine. Zaključeno je da je potrebno zatražiti odgovore kantonalnih ministarstava obrazovanja o navedenom pitanju koja VNMFBiH ni prošle godine nije dobilo.

S obzirom na uslove u kojima je radilo VNMFBiH uradilo je dosta, jer još uvijek, dio više puta pomenutih problema, nije riješen, a najakutniji su davanje saglasnosti na Poslovnik i Statut, te sredstva za rad i naknade i putni troškovi članovima VNMFBiH. Istovremeno, činjenica da nisu postojala sredstva za angažovanje stručnjaka – eksperata vezano za pravnu i finasijsku problematiku, onemogućilo je VNMFBiH adekvatnije i potpunije učešće u radu domova PFBiH i pojedinih komisija.

Sarajevo, 5. 11. 2012. godine